



**TAPAK 3**

**Gauhati High Court-i Akhil  
Gogoi nem bail magütsü**

**TAPAK 8**

**PM Imran-i Shia Hazara lokti  
dang tasü mang aremtsü mepeshi**

**VOL. XVIII NO. 84 (ADOK 84) DIMAPUR**

**ROGONÜ (FRIDAY) AENJETI (JANUARY) 08, 2021**

**₹ 5.00**

**COVID-19 Nagaland: Nisung 6 dak potet; 11,960 kümogo**

**Kohima, Aenjeti/January 7 (TYO):** Nagaland nung nisung trok dak COVID-19 tashidak potetba sülen state nung tashidak menar 11,960 jungogo, ta health ketdangsürtemi Brehostibarnü metetdaksü.

"Tanü nisung 6 dak #COVID-19 tashidak potetogo. Dimapur- 3, Kohima- 2, Peren- 1. Maneni shiranga alir nisung 7 anepogo. Dimapur- 4, Kohima- 3," Health Minister S Pangnyu Phom-i tweet asü.

Tashidak menar ajak senteper nisung 11,610 anepogo aser nisung 129 tang temang anepaludar, ta pai ashi.

Nisung tenet anepba sülen recovery rate 97.07 percent nung lir koba Bodhbarnü 97.06 percent aliba dang nungi timba aser tang tashi nung timtiba asütsü, ta paisa ashi. State nung tang COVID-19 agi tonger alirtem 1.07 percent dang lir, ta Pangyu-i ashi.

Taoba ghonda 24 tsüingda Dimapur nung tashidak menar alir nisung pezü asüba sülen asür 84 jungogo aser item rongnung parnok 72 coronavirus ajanga aser 10 tanga timtem agi asü. Kasa mapang nung nisung ana asüba kuli tang bushidar, ta Director of Health and Family Welfare Department Dr Denis Hangsing-i metetdaksü. Shiranger 137 tanga state-i anirogo, ta paisa ashi.

District balala nung COVID-19 potetba: Dimapur (6,423), Kohima (3,718), Mon (604), Peren (504), Tuensang (244), Mokochung (179), Zunheboto (142), Phek (47), Kiphire (41), Wokha (39) aser Longleng (19)

Tashidak poteter alirtem rongnung Traced Contacts ajanga 4,893, armed forces personnel 4,657, tanga state nungi arur 1,843 aser yakbang nung inyaker 567 densema lir, ta pai ashi.

District balala nung tang temang anepalurtem: Dimapur (63), Kohima (44), Mokochung (13), Peren (6), Mon (1), Longleng (1) aser Kiphire (1).

Tang shiranga alirtem rongnung nisung 22 dak tashidak keta aliba temaitsü terara sayur, nisung ka kanga shiranga oxygen agidar aser trok ventilators nung yua lir. Ajak senteper nisung 101 dak tashidak keta aliba temaitsü kecha mesayur, ta Dr. Hangsing-i ashi.

Taneptsü angurtem: Dimapur (6,232), Kohima (3,619), Mon (592), Peren (498), Tuensang (243), Zunheboto (139), Mokochung (157), Phek (47), Kiphire (39), Wokha (35) aser Longleng (9).

Nagaland nung tanü tashi nung COVID-19 samples 1,21,428 tendangogo. RT-PCR ajanga 72,585, TrueNat nung 36,805 aser Rapid Antigen Test ajanga nisung 12,038 tendangogo, ta paisa ashi.

**Dzukou nung morok mi tasen poktetba mali**

**Kohima, Aenjeti/January 07 (TYO):** Dzukou nung morok mi adoker Brehostibarnü agi anogo ter jungogo, saka mi tasen adoksema mangu. Iba morok mi yagi Kohima district nung arem teluka rongdokogo, ta Brehostibarnü osang ka ajanga ashi.

Dzukou range, kong temonungratsü Dzukou valley lir, yangi December 29, 2020 nungi mi adoka arongba manener.

State Disaster Response Force (SDRF), police, Fire and Emergency Services, Forest, State aser District Disaster Management Authorities tem den yaritepa Southern Angami Youth Organization nungi volunteers temi ali nung iba morok mi remseptsü meranga arur.

Ali nung iba morok mi remsepba maparen nung National Disaster Response Force nungi nübu talila yoksem aser tenem longren nung mi adoka alidak tziü aintsü atema IAF chopper pezü amshia liasü.

Home Department kübok Nagaland State Disaster Management Authority (NSDMA) indang OSD, Johnny Ruangmei-i ashiba agi, Dzukou nung morok mi remseptsü atema ali aser anüng nungi anogo ter tashi maneni maparen balala inyaka arur, aser iba mi tali jangruloka aotsü aliba

azüokteta lir.

"Tanü mi tasen adokba meliasü, aser jangrua aliba mi shilem tuluka remseptetogo," ta Ruangmei-i January 7, 2021 nü osangbener dang ashi.

Mi tasen jangrutetba jangjatsü atema NSDMA, NDRF aser IAF ajanga Hokulbarnü aerial survey agitsü. Iba survey agiba sülen ang iba operation tembangsü atema jembitsü, ta pai ashi.

Ajisüaka ali nung aliba team tem renema alitsü aser asüng anepbongi mibenba maparen tenzüksü, ta ashi.

Tang iba morok mi remseptsü atema ang temolung agütsür asünung mi jungjunga remseptetba sülen ang teraksa agütsüba asadangtetsü, ta Ruangmei-i ashi.

Tangbo tensa azüoka lir saka mi tasen jangjatetba mapang mi remsepba maparen tenzüksü renema lir, ta Divisional Forest Officer, Kohima, Rajkumar M-ia ashi.

Hokulbarnü osang tajung angashitsü teimla lir, ta ketdangsür anaprongi ashi.

"Hokulbarnü Kohima anasa Dzukou valley nung morok mi remsepba maparen nung IAF-i helicopter pezü amshia maneni yaritsü," ta PRO (Defence) Kohima Lt Col Sumit K Sharma-ia ashi.

**Consumer Rights Organization anogomung mungogo**



**Consumer Rights Organization, Nagaland pur January 7, 2021 nü 3 buba Foundation Day amungba mapang Advisor Pukhayi Assumi den Consumer Rights Organization nungi ketdangsürtem külemi tangokba noksa ka yangi angur.**

**Dimapur, Aenjeti/January 07 (TYO):** Consumer Rights Organization, Nagaland pur 3 buba Foundation Day ya Brehostibarnü Western Chakhesang Hoho ki nung mungogo, kong Advisor, Food & Civil Supply, Legal Metrology and Consumers Protection and Taxes, Pukhayi Assumi alakteta jaoker ama dena liasü.

Iba sentong nung jembiba mapang Pukhayi-i consumer societies dang pei mapa nung nendaka inyaka consumer tajungtiba nung tenzüksü

ayongzü. State nunga süang, national level nunga süang, mazung mashir consumer tem kumzüksü atema consumer organization ya kanga tongtipang lir, ta pai ashi.

Lokti tentet ajunga kumzüka aser wazüka ayutsü atema state sorkar lir, anungji department shiai akokba nung teyari agütsütsü, ta pai ashi.

Takum alitsü atema asen otsüla-oboula nungeri dangar dak metaloka mali. Saka tanü Naga nungeri rongsen resources peria liaka züsentettsü mesüra

yanglutsü amadoker. State economy tajungba kumdaksütsü aser nüburtem pei sasa pei peri inyakteta alitsü atema nüburtem nem shisa agütsütsü mapang lir, ta Advisor Pukhayi-i ashi.

State sorkar aser Department of Legal Metrology and Consumer Protection den lungjemer consumer rights awareness campaign tenzüksü atema iba anogomung ya amunger, ta state president, Consumer Rights Organisation, Nagaland, James Jungio ajanga ashi.

**Highly Pathogenic Avian Influenza dak sendakba nung tetuyuba agütsü**

**Dimapur, Aenjeti/January 7 (TYO):** Linük nung aser talisa Kerala, Rajasthan, Madhya Pradesh aser Himachal Pradesh nung Highly Pathogenic Avian Influenza (HPAI) timba akümba dak sendakba nung Directorate of Animal Husbandry & Veterinary Services-i, H5N8-i adokdaksüba Avian Influenza atema renema alitsü aser azüoktsü asoshi tetuyuba agütsüba den state nung tashidak azüoktsü atema jenjang agitsü asoshi Influenza Type- A Virus ka nüburtem aser Animal Husbandry & Veterinary Services ketdangsürtem nem agütsüogo.

1. Nüburtem dang ana, batak aser kidang metsüba ozütem yimya masüba agi shiranga aser tasüba ajangshira parnok anasatiba aliba Veterinary Health Centre dang metetdaksütsü mepeshir.
2. Ajungbena asüba an, batak aser ozütem machitsü mepeshir. Ajisüaka meshirangi aliba ana, batak

aser ozü achitsü asoshi kecha tetsübu mali.

3. Tashidak menatepa aoba sottsü atema batak/an metsürtem dang mejangjaba tesem nungi batak/an bener arua memeyokteptsü mepeshir.
4. State nung entsü, an/batak chanu, batak aser ozü takütem shishilembaba Poultry Entrepreneurs/ Farmers/shishilembar tem dang an/batak/ozü tem koba state nungi bener aru iba indang osang agütsütsü aser tashidak pokteta aliba state aser kidanger state tem nung bener marutsü mepeshir.
5. CVO tem ajaki Subordinate Officer, Field Officers, Staff aser yimdam yimtsüngtem nung inyaksangshirtem nem linük nung tashidak tali akümba indang metetdaksütsü aser Education & Communication Campaign ajanga pei tata district tem nung tashidak indang osang

agütsüba inyakyim takang ka benoktsü aser nüburtem nem osang tejangja agütsütsüla.

6. CVO tem ajaki arem ozü tem dak sendakba nung Forest & Wild Life Department den sendaktepa inyaksüla. District nung tüzü mang tulu aliba aser metsü ozütemi semdangba tesemtem nung aliba CVO tem tali kumküma alitsü nüngdaker.
7. CVO tem ajaki tang aliba Rapid Response Team (RRT) activate asütsüla aser mapa nungi anenba/transfer asüba ken o kar danga lira team tanaben tentetshitsüla. RRT tem ajaki anatsülen nungi tesendaktep atema grass root level den indang indanga sendakteptsüla.
8. COV ajaki iba dak sendaka aliba ken o tem ajak atema Directorate Office for Avian Influenza (HPAI) aser ELISA Laboratory, Kohima den surveillance aser sample bendentsü atema tongteprateptsüla.

**David Thingchum Sangtam NPSC züngsem asütsü shim**

**Kohima, Aenjeti/January 7 (TYO):** Dr Imkongliba Hall, Raj Bhavan, Kohima nung Brehostibarnü David Thingchum Sangtam, Nagaland Public Service Commission (NPSC) züngsem asütsü shimogo.

Angh R. N Ravi lenisüba kübok tenangzüktepba sentong agi, kong Minister of Planning and

Coordination, Land Revenue and Parliamentary Affairs, Neiba Kronu-i anir legislator tem aser sorkar ketdangsür tejentem aika dena liasü.

Kasa mapang nung cabinet sub-committee-i, state nung reservation policy ajunga asadangshitsü atema benokogo.

Osangbenertem den sensaksema mapang Neiba

Kronu-i, "reservation policy ajunga asadangshitsü atema mapang agitsü akok. Iba inyakyim mapangshia inyakshtitsü masü asünung telemtetba tajung ka agitsü atema ENPO aser tanga kintem densema ken o rajema alirtem jaoka shisatsü lemsateptsü shidangogo," ta ashi.

*(Maneni tapak 2 nung...)*



## Naga Bowl Express restaurant-i sempet tajung angu



Rev. Lima Jamir aser Naga Bowl telok den külemi tangokba noksa nung angur.

**Dimapur, Aenjeti/January 07 (TYO):** Merit Awards and Market Research Private Limited ajanga Naga Bowl Express restaurant, Dimapur nem Most Admired Traditional Naga Cuisine Restaurant in Nagaland sempet agütsü. Merit Awards and Market Research Private Limited yagi India nung Food and Hospitality professionals temi dangar dak nungi alakteta mapa inyakba atema sempet agütsür.

India indang Most Prominent Food & Hospitality Awards 2020 sentong ya virtual yimya nung November 21, 2020 nü New Delhi nung agia liasü. Iba sentong tetendanger tem yamai liasü:

1. Chef Sanjeev Kapoor - Indian celebrity chef,

entrepreneur aser television personality. Kapoor ya TV show Khana Khazana nunga shilem agia lir, koba Asia nung show talangtiba ka lir.

2. Chef Vicky Ratnani - Indian chef. Pai Vicky Goes Non Veg ta nüngja agütsür cookbook ka zülua lir.

3. Chef Kunal Kapoor - Indian celebrity chef aser restaurateur, shiba Master Chieg India host asü aser yangji tetendanger ka liasü.

Iba takok konang tepela temaitsü Naga Bowl Express Restaurant nung January 7, 2021 nü sentong tilaka agia liasü, kong Dimapur Ao Baptist Arogo nungi Pastor,

Rev. Lima Jamir arua moaja liasü.

Ibai Naga nunger tejak tentetba mapang ka lir, kechiaser iba restaurant kibur, Alemjungla Jamir-i bendanga agütsür inyakba ajanga Naga nunger chiyongtsü National jenjang nung metetdaksür, shibai sapang ajunga nung Naga nunger chiyongtsü ajungkettsü atema maongka bushia aru, ta Rev. Loma-i ashi.

Iba sentong nung Alemjungla Jamir-ia Naga Bowl nung inyaker dang bendanga agütsür inyakba, aser Naga Bowl Express tenzüker küm ana tashi arudang customer aser temolunger balalai parnok yariba atema pelaba lemsatepa liasü.

## Naga Regiment pur Ex-Servicemen telungjem senden ka agitsü

**Dimapur, Aenjeti/January 07 (TYO):** Naga Regiment indang Ex-Servicemen pur telungjem senden ka Rangapahar Military Station, Dimapur nung January 11, 2021 nü agitsü. Iba sentong nung Lt Gen RP Kalita, AVSM, SM, VSM, GOC 3 Corps, COR

of Kumaon & Naga Regts aser Kumaon Scouts tongti tesemdanger ama arua adentsü, ta sangdong ka ajanga ashi.

Anungji iba sentong nung Naga Regiment indang Ex-Servicemen den kinungsü arua adentsü mepishia metetdaksür,

ta ashi.

Iba sentong nung adentsüpur jelia mobile number 06009499450, 07005089194 aser 07005090533 nung metetdaksütsüla, ta sangdong nungsa shia lir.

## Asür Lathon Kemp den asükhu lemsateper

**Dimapur, Aenjeti/January 07 (TYO):** Naga Rising team-i Lathon Kemp asüba asoshi kinungertem den külemi mang ayimer, ta sangdong ka ajanga ashi.

Watsü Loshwelu Kemp aser Sendenyu yimtsüng nung Gaon Bura inyaksang Wapong Kenshwini Kemp na jala, Lathon Kemp ya 1924 küm aso. La ya arishi küm 97 tashi jangratema taso shia liogo.

Sendenyu Women Society (NNC Women Wing) nungi tetsür pezü rongnung Lathon Kemp ka ya ka liasü, shibai A.Z. Phizo totuyuba nung

ajemdaker Naga nunger nisan mezüng taka liasü.

Tebang o agi dang süaka asür Kemp-i item tatalokbatem mesamai jembia arua linük tenzüka wadang nung Naga nunger tetsürtemi shilem balala agitsü atema lenmang lapoktsü, ta Naga Rising ajanga ashi.

Naga political movement tenzüka mapang asür Kemp-i shilem agiba ya asen otsü nung teti alitsü.

La masüadang asen Oral History Project nung shilem ka ama asür Kemp-i ajangshibatam tejangja video nung tangoktetba atema Naga Rising team-i

konang ka ama züngshir, ta sangdong ajanga ashi.

Maneni NSCN/GPRN indang Rengma region züngsem ajunga aser Central Administrative Officer (CAO)-ia Lathon Kemp asükhu lemsatepogo.

Lai Naga lima atema shilem agiba teti bilemtettsü. Rengma region-i mangyimer kibong den asükhu lemsateper aser Tulisang Tsüngremi mangyimer molung nung anisüngzük agüjang ta sarasademtsür, ta N.S Lorin (Kilonser), CAO Rengma region ajanga sangdong ka nung ashi.

## DC Kohima ajanga arem marongtsü nenshia metetdaksür

**Dimapur, Aenjeti/January 07 (TYO):** Deputy Commissioner & Chairman DDMA Kohima, Mohammed Ali Shihab A IAS ajanga sangdong ka nung, tarutsü nung totuyuba tasen ka magütsü tashi Kohima district nung arem arongba nokdangba totuyuba maneni alitsü, ta nenshia metetdaksü.

Iba dak sendakba nung Kohima district kübok putu menden ajunga dang nüburtem nem arem marongtsü

metetdaksütsü totuyuba agütsüogo, koba mapa agi nübur meyong osettsüset raksaba kisüng masü saka tzü-mopong dena menentsür, ta ashi.

Nisung mesüra yimtsüng kari danga iba totuyuba nung aibelenba metetra tapet temerenshi agütsütsü aser senchi achitsü. Iba den külemi iba senchi memonok tashi yimtsüng nem agütsüba VDB Grant soita atatsü, ta kasa sangdong ajangasa ashi.

## Tuensang DPDB senden menogo



DC aser Vice Chairman DPDB, Kumar Ramnikant IAS lenisüba kübok DPDB senden amenba noksa nung angur. (IA Tuensang)

**Dimapur, Aenjeti/January 07 (TYO):** Tuensang District Planning and Development Board pur ita shia amenba senden January ita atema Brehostibarnü Deputy Commissioner, Tuensang indang Conference Hall nung menogo. Iba senden ya DC aser Vice Chairman DPDB, Kumar Ramnikant IAS lenisüba kübok agia liasü.

Iba senden nung NH 202 kübok apu tejentem, New Tsaru yimtsüng nung aliba 500KV Transformer tesem dangai

belener aotsüba aser transformer upgrade asütsü indang jembia liasü.

Society register asütsüba dak sendakba nung Eastern Nagaland Agri & Allied Farmers Association atema ENPO nungi tezüluba ka meshitsü aser danga district tem nung aliba Agri and Allied department tem nungi temelaba meshir sorkar dangi yoktsü lemtet.

Kasa senden nungsa Republic Day sentong atema mapa lema liasü.

## Zunheboto DPDB senden January 12 nung amentsü

**Dimapur, Aenjeti/January 07 (TYO):** Zunheboto indang District Planning Development Board pur January 2021 atema senden ya January 12, 2021 nü anepdang 10:00 ako nungi Deputy Commissioner indang Conference Hall nung amentsü, ta Vice Chairman DPDB aser Deputy Commissioner, Zunheboto, Peter Lichamo-i Brehostibarnü sangdong ka

nung metetdaksü. Iba senden nung Advisor aser Board chairman adentsü, ta paisha ashi.

Iba senden nung NH, Maducon company, PWD, PHE department nungi arua adentsü metetdaksüogo.

Republic Day sentong densema ken o jenti jembitsü alinung district nung head of offices ajunga arua adentsüla, ta sangdong ajangasa ashi.

## Wohka DPDB senden thinener

**Dimapur, Aenjeti/January 07 (TYO):** District Planning and Development Board (DPDB), Wohka mendenpuba aser Advisor, Horticulture & Border Affairs, Mhathung Yanthan ajanga sangdong ka nung ashiba agi, ita shia amenba

Wohka DPDB senden January 2021 atema Republic Day sülen amentsü.

Anungji board züngsem ajungai iba temelenshi ya metetjema alitsü mepishir. Iba senden atema anogo tejangja maneni metetdaksütsü, ta sangdong ajanga ashi.

## David Thingchum Sangtam... (TAPAK1NUNGI...)

Minister Neiba Kronu-isa, cabinet sub-committee-i parnoki benokbangba onüktem temelaba agitsü agütsüogo, ta ashi.

Kasa mapang nung ENSF takhangba ataloktsütsü atema

tatembangbuba anogo January 10 nü atakzüksü aliba dak sendakba nung Kronu-i, cabinet-i ENSF nem osang agütsütsü atema P. Paiwang Konyak aser Toshi Wungtung na nem nongloksüogo, ta ashi.





Manipur Chief Minister N. Biren Singh-i Brehostibarnü Sekmai and Kanglatongbi jila nung tetsürtem atema mejeta shishilembadak ana amenoktsü asoshi nüngshilong azüngtsüogo. Nüngshilong azüngtsüba mapang Singh-i, iba shishilembadak ajanga iba tesem nung aliba lokti balala nungi tetsürtem nem tajangzük agütsütsü ta ashi.

## Gauhati High Court-i Akhil Gogoi nem bail magütsü

**Guwahati, Aenjeti/January 7 (Agencies):** Krishak Mukti Sangram Samiti (KMSS) lenir Akhil Gohoi-i bail atema benokba Gauhati High Court-i magizük.

Akhil Gogoi indang bail plea ya obendanger ana agi kümtetba Gauhati High Court bench kati magizük.

Gogoi indang bail application magizükba Gauhati High Court-i indang bench nung Justice Kalyan Roy aser Justice Ajit Borthakur na densema liasü.

Bail magizükba tetezü, KMSS lenir Akhil Gogoi

maneni tepuokdak ayutsü.

Anti-Citizenship Amendment Act (CAA) anema longkak aitba sentong nung shilem agiba atema Akhil Gogoi ya 2019 küm December ita 12 nü apu. Iba longkak aitba sentong ajanga December 11 nungi 13 tashi Assam ajunga anakshija liasü.

Akhil Gogoi joko küm ka dak tema tepuokdak yua lir.

Lokti tentet aikati Akhil Gogoi apuba atema ken o ashishiogo aser parnokisa pa tangsa tang chioktsü atema kanga arudar.

Akhil Gogoi ya Unlawful

Activities Prevention Act (UAPA) act, section 28 aser 39 nung aija apu.

Kasa mapang nung sorkar anema nokdakba dak sendakba nunga Akhil Gogoi anema tashishiba benokogo.

Taoba küm August ita tetenzüklen Guwahati nung special NIA court kati Akhil Gogoi-i bail atema benokba magizük.

Special NIA court-i, Akhil Gogoi anema kulitem bendena aliba dak dang metaloker obendang agütsü aser ashiba agi, taitsüba ajak yabo shitak ta meshitettsü.

## Tripura nung maneni telungpur tebilemtsü tenzükogo: BSF IG



Sushanta Kumar Nath (File photo)

**Agartala, Aenjeti/January 7 (Agencies):** BSF Inspector General (IG) of Tripura Frontier, Sushanta Kumar Nath-i Brehostibarnü, Tripura nung maneni telungpur tebilemtsü tenzükogo, ta ashi.

Agartala nung Brehostibarnü osangbenertem den sensaksemba mapang BSF IG Nath-i, "state nung telungpur poktetba onoki jangjaa lir. Taoba küm ka tsüngda iba ya asadanga arudar," ta ashi.

"State sorkar, state police aser iba wadang nung sendaka aliba tanga lokti tentettem den angatettepa onoki kümküma alitsü atema tenüngdakba jenjang ajak agiogo," ta Nath-i ashi.

Tenokdangba agütsür aliba teloktem inyaksangshiba tesemtem indang osang tejangja magütsüka BSF IG-i ashiba agi, itangitertem ajanga arrtsü telung nung aser IB arrtsü temalen tesem kar nung telungpurtem

inyaksangshiba jangjaogo.

Shalbagan nung BSF Headquarters nung osangbenertem den sensaksemba mapang BSF IG Nath-i ashiba agi, "Tripura nung Tripura Frontier kübok BSF sepaitemi tetsükdaktsütem jenti liaka tesem ajak nung kanga bendanga agüja inyakdar.

"Ramen tashidak kanga bulua adokba tesemtem nunga BSF sepaitemi parnok mapa bendanga agüja inyaka international arrtsü kanga takok ngua meitdar," ta Nath-i ashi.

Ajisüaka pai internatonal arrtsü temalen telungpur teseptem kwi ali, iba indang osang agütsütsü memulungi liasü.

"Iba sabang nung ni iba osang magütsütettsü," ta pai ashi.

India aser Bangladesh arrtsü shilem 95 bo tang tashi nung atsübanga lir aser tanungba tesemtem nung Bangladesh

Border Guards (BGB)-i anemba ajanga maparen bangdaka lir, ta IG-i ashi.

BSF sepaitemi 2020 küm temesepba mozü, tenokdangba agütsür aliba osettem aser hon sen crore 41.95 alang puogo.

Sen crore 9.41 alang ganja pur police nem agütsüogo, ta pai ashi.

Taoba küm ka tsüngda BSF-i sen 9,41,45,200 alang mature/immature ganja saplings 43,37,150 raksatsüogo.

Iba inyakyim nung state police aser state forest department-a densema lir aser mapang kar nungbo BSF kijai jenjang agia liasü.

Maneni BSF IG-i, BSF-i India nung 85 aser Bangladesh nung 46 densema nisung 131 puogo, ta ashi.

Item nisungtem ya karbo shibelenba maparen nung densema liasü. Kasa mapang nung nisung karbo ozüng alema arrtsü adentsü meranga lia apu, ta paisa ashi.

## Meghalaya MLA 60 prongla dang ILP atema Delhi-i ao akhangtsü mepeshi

**Guwahati, Aenjeti/January 7 (Agencies):** Meghalaya nung Inner Line Permit (ILP) benoktsü akhangba tali kümogo.

Confederation of Meghalaya Social Organisations (CoMSO)-i, Chief Minister Conrad Sangma densema state legislator 60 prongla New Delhi-i oa ILP benoktsü atema akhangtsü shiogo. Parnokisa state nung MP asem dang iba ken o taruba Parliament session nung benoktsü shiogo.

ILP ya official kuli kaket ka lir aser iba ajanga India nung lisorpurtem teküzmükba agütsür aliba tesemtem mapang tatakzük ka atema dang semdangdaksür. Northeast nung state aikati iba ya tanga nisungtem nungi teküzmükba ka ama agir. Tang Nagaland, Mizoram, Arunachal Pradesh aser Manipur nung iba ya benoka lir.

2019 küm December ita Meghalaya Assembly-i, state nung ILP benoktsü atema agizüka ayu.

Tawa Congress MLA PT Sawkmie-i, state nungi MLA tem New Delhi-i oa ILP akhangtsü atema shidangogo.

Iba tebilemdangba ya CoMSO-ia pusemogo aser mendenbuba Robert June Kharjahnin-i ashiba agi, state nung ILP benokdaksütsü atema

legislator temi Centre sorkar nongshitsüla. CoMSO-isa, ozüng yanglurtem den Delhi nung oa longkak aitsü atema parnokia mulunga lir, ta shiogo.

Hombarnü Union Sports Minister Kiren Rijiju-i Shillong semdangba mapang ILP benoktsü aser Citizenship (Amendment) Act agintsü khanga Khasi Students' Union-i ayongzükba longkak aitba sentong kati agizük.

Mapang tatsüka lir osangbenertem den sensaksemba mapang Rijiju-i, longkak aitba mapang lendong kecha mataloktsü atema kümdangshitsü metetdaksü. Pai ashiba agi, iba ajanga Northeast noksa raksatsütsü. Ajisüaka CoMSO-i ashiba agi, "Centre-i Meghalaya ILP küboki aitdakja yimden yimsüsüba tsütsü parnok tejangraba jungkai adoka sayutsüla."

Meghalaya sorkari state kübok Ri Bhoi district nung taoba küm December ita entry-exit point ka amenokogo. Iba lenmang ya Shillong leni aoer. Sorkari residential address, anenzükdak, EPIC aser pa/lai semdangtsü aliba tesem amla indang osang densema tesemdangar ajak indang jurila osang tejangja benden. Tang lokti tentet balali kasa entry-exit points ya state kübok tanga tesem nunga amenoktsü akhangar.

## Karimganj nung smart fencing amshia arrtsü shibangtsü

**Guwahati, Aenjeti/January 7 (Agencies):** Assam kübok Karimganj jila nung India aser Bangladesh na arrtsü nung smart fencing yoktsü.

Iba teletmetba ya Assam sorkari agia liasü.

Smart fencing nung advanced surveillance system aser alarm gadgetry densema lir.

Smart fencing ya Assam kübok Karimganj jila nung India aser Bangladesh na international arrtsü nung atsü matsüi aliba tesemtem nung amshitsü.

Karimganj jila nung kilometer 4.5 talang India aser Bangladesh na arrtsü nung smart fencing inoktsütsü.

Temetettsükaji Border Guards Bangladesh (BGB)-i Karimganj jila nung Indo-Bangla arrtsü nung atsü

atsütsü memulungi arudar.

International arrtsü temzüng ozüng kübok arrtsü anatsülen atsü ya shidakba arrtsü nungi yard 150 pilar atsütsüla, ta shia lir.

Ajisüaka international arrtsü temzüng ozüng dak ajemdaker atsü atsüra Karimganj jila ya atsü atsüba temalen akümtsü.

Assam sorkari Karimganj jila nung iba tesem kümzüksü atema international arrtsü temzüng ozüng dak sendakba nung atsüanem akatsü mepeshia asüngdangogo.

Ajisüaka BGB-i, international arrtsü temzüng ozüng dak sendakba nung atsüanem akatsü asoshi kecha tejangraba mali.

Anungji Assam Home Department-i, smart fencing inoka arrtsü shibangtsü atema asatetogo.



# भारतीय रिज़र्व बैंक

## RESERVE BANK OF INDIA

DEPARTMENT OF SUPERVISION, GUWAHATI

पर्यवेक्षण विभाग, गुवाहाटी

[www.rbi.org.in](http://www.rbi.org.in)

### NÜBURTEM DANG SANGDONGER

#### Non-Banking Financial Companies nem agütsüba Certificates of Registration agientsür

Section 45-IA indang Reserve Bank of India Act, 1934 (RBI Act) sub section kübok Reserve Bank of India-i Non-Banking Financial Company balala nem agütsüba Certificates of Registration agientsüogo, anungji, section 45-1 RBI Act indang clause (a) nung agüja aliba ama Certificate of Registration agientsür sülen item company dang Non-Banking Financial Institution indang business inyaksü asoshi temeleba magütsür.

Non-Banking Financial Companies, shirnok indang tenüng list nungi Certificate of Registration agientsüogo, iba osangji Reserve Bank [https://rbi.org.in/Scripts/BS\\_NBFCList.aspx](https://rbi.org.in/Scripts/BS_NBFCList.aspx) official website nung adoktsüogo aser kasaji anogo shia metetdaksüdar.

Reserve Bank ajanga Certificate of Registration agientsür alir company züngsemtemi osang metettsü atema Reserve Bank of India official website ajanga tongtepratepang.

**Tesem: Guwahati**

**Deputy General Manager**

### सार्वजनिक सूचना

#### गैर-बैंकिंग वित्तीय कंपनियों को जारी किए गए पंजीकरण प्रमाणपत्रों का निरस्तीकरण

भारतीय रिज़र्व बैंक ने भारतीय रिज़र्व बैंक अधिनियम, 1934 (आरबीआई अधिनियम) की उप धारा 45-IA के अंतर्गत कई गैर-बैंकिंग वित्तीय कंपनियों को जारी किए गए पंजीकरण प्रमाणपत्र निरस्त कर दिये हैं। अतः पंजीकरण प्रमाणपत्र निरस्त कर दिये जाने के बाद, ये कंपनियाँ आरबीआई अधिनियम की धारा 45-1 के खंड (a) में यथापरिभाषित गैर-बैंकिंग वित्तीय संस्था का कारोबार करने के लिए अब अधिकृत नहीं रह गई हैं।

जिन गैर-बैंकिंग वित्तीय कंपनियों के पंजीकरण प्रमाणपत्र निरस्त कर दिये गए हैं, उनकी सूची रिज़र्व बैंक की आधिकारिक वेबसाइट [https://rbi.org.in/Scripts/BS\\_NBFCList.aspx](https://rbi.org.in/Scripts/BS_NBFCList.aspx) पर प्रकाशित है और इसे नियमित रूप से अद्यतन (अपडेट) किया जा रहा है।

जिन कंपनियों के पंजीकरण प्रमाणपत्र भारतीय रिज़र्व बैंक द्वारा निरस्त किए गए हैं, उनके बारे में जानकारी के लिए जनसाधारण भारतीय रिज़र्व बैंक की आधिकारिक वेबसाइट देख सकते हैं।

**स्थान: गुवाहाटी**

**उप महाप्रबंधक**





# TIR YIMYIM

## YIMOBILEM (EDITORIAL)

DIMAPUR ROGONÜ, AENJETI(JANUARY) 08, 2021

### NÜNGDAKBA OSET KA

- Tangsen Lemtur

**S**martphone ajak nung calendar lir, ajisüaka kidang takdang shia nung calendar madaka yur reprangba bosa madoksar. Taoba hopta ni 2021 kum atema calender kar alitsü bushi saka mangu. Joko tesüiba anogo ishika kidang ni mapa inyakba takdang nung 2020 kum calendar nung keta aliba May ita nung 'January' ta zülur amshi, kechiyong 2020 May 1 aser 2021 January 1 napronglaji Hokolbar anogo lir. Calender tejenjisa amshia lia Arogo ka nung toklang tenzüker kati kü nem Arogo calendar asem agütsü, anungji kanga pelasete kidangi bener aruba sülen kidanger nem-a calendar ji ka agütsü nung kanga pelasete agizük. Joko kum aika Arogotemi peipei Arogo sasep nung kum piyong inyaka aotsü sentong ajenloker calendar yanglua Arogo nung züngsem kibong shia nem lemstür; ibaji-a junger, ajisüaka aikati kidang calender ji ana-asembosa nungdaker, anungji calendar ka jagi meperir. Ano khenkhenbo osangkaket kar nungbo tapak ana sünga calendar adoktsür, aser iba jagi-a asen nungdak terabo peritsür. Calendar ya ajaki nungdakba oset ka lir, anungji tamalenbo kum tatembanglen lokti tentet balalai calendar adoka ayok, karibo pei Arogo, club, society mesüra Jubilee mong balala tenüng nung calendar yanglua ayok, ano senotsü tajangzük angutsü atema calendar yanglua ayokertem-a aika pokteta liasü. Jabang mayimi calendar ayoker jenti liasü; maa, ta meshiteti calendar aika alidena ayuba mapang-a asenoki ajangshiogo. Calendar ayoker tali poktetba agi nungdakba oset ka sür nung minprongtsü oset kadang mesüka kümdaktsü aser district aika nung ketdangsertemi ozüng zünga calendar ayoktsü memela. Yaküm December ita tetenzüklen Mokochung nunga MCCI-i raffles, lotteries, event tickets, buffet coupons aser calendar ayoktsü memelaba aser züngsemtem dang shinga nem-a saru magütsütsü aser item ama tickets malitsü nenshia metetdakja liasü. Kum ishika tejaklen Khristmas benjung atongtsü hopta ishika dang lia asen lima nung item ama yokyayokchir jenti poktet, iba yongji tangbo kum shia December tetenzüklen district aika nung ketdangsertemi shinga nema Khristmas donations magütsütsü aser tickets malitsü sangdonger; iba jagi asen lima nung saru meshiba aser kangshia tickets ayokba tia sayur. Ketdangsertemi lottery, lucky draw aser ticket balala ayokba kanga junga nokdangtetba agi nisung aika anisüngzüker. Calendar yabo nungdakba oset ka surnung minprongba oset ka mesüka kümdakja yoktepa agi nokdangba dang lir, anungji ketdangsertemi calendar ayoktsü asoshi tejangja telok kar nembo temelaba agütsü nunga junger ta bilemer. Arogotemi kilen shia calendar alemba inyaksangshi ya kanga junger, ano kokra kilen shia calendar kaka masü saka iba dang nungjagi tali lemstüra tajungba dang.

## OLEMSABANG

### KÜM TASEN DEN TONGPANG TASENI MEJAOKDI

~ S. T. Yapang Lkr. Kohima

Tongpang ajak kasa masü, karbo nüburi memeteti raratsüla lir, karbo nübur ajaki meteta raratsüla lir, tang Naga nübur ajaki meteta aser pei akokba shilem agia raratsü akokba kar lemsatepnür, iba ya kum taseen nung asenoki tongpang taseeni tasa taseen renemshir apusodi;

1. Head Post Office Kohima: October 31 anogo ni Kohima head post office-i shiti ka yoktsü asoshi ao, ibaji 12:40 PM shi liasü, saka taktang shibanger staff-tem telung nung inyaka liasü, ni ashi "Yashi nenok link maliba agi shiti meyoktet, ni kanga nungdak ka yoknür anungji khen lapokang" yangji inyaker staff tetsür ka tebur ka tenati ashi "Joko mapang temogo" ni asüngdang "Mapang telatet koba tashi?" "Working days nung 3:00 PM tashi aser 1st, 3rd, aser 5th Saturdays nung 12:00 PM tashi" ta shia kishiji melapok. Anungji onoki RTI ka asüngdang aser iba telangzüba Department of Posts: India, Office of the Superintendent of Posts Nagaland:Kohima RTI reply NO.f-5/RTI Act 2005/18-19/Pt-IV Dated Kohima 27/11/2020 nung ashiba agi "Working days nung 9:00 AM nungi 4:00 PM tashi aser 1st 3rd aser 5th Saturdays nung 9:00 Am nungi 1:00 PM tashi" ta langzüa lir, anungji, ni item staff-tem dang 10/12/2020 anogo nung "Nenoki kü dang tiyazü shiogo, saka nenok tang nungi mapang shitak amshiang" ta o tajung agi shir yutsüogo. Nagaland yimtiba nung tashitemeteter paika lir item 3rd aser 4th grade staff anasemka nem kum paika mesüshia arudaktsübaji bilemdangang, aser parnok ya taochi makartem anungji parnok dang taochi mesayutsü. Department ajak nung shirnoki mapa meinyaknür parnok asoshi voluntary pension agitsü lenmang sadema lapoktsütsüla. Tang nungi Kohima Head Post Office-i shiba aodang item mapang shitak ya mamashiba ngudir, idangjisa anasatiba police station nung FIR benoktsü, aji shingaia tangar dak teimla, iba ya nübur ajak mapa ta angatetdi, iba kasa inyakyim nung bank kari parnok sasa mapang tatsüba akümba den hopta nung Wednesday sen magizükdaktsür, saka parnok sasa memelenshira memenui par osang parnoki osangkaket nung azüngtsü.
2. Power department; Onoki Power department dang RTI asüngdanga arur yang nung jaki ajemdaker 10/08/2020 anogo nung Engineer-In-Chief, Power Department Govt. of Nagaland dangi "Kohima Electric Sub- Division 1 ajanga Single Domestic LT Consumer meter taseen ka inokba nung sen 3793 agir, saka ya market nung sen 500 agi angur anungji pei sasa alia inoktsü temelaba agüjang mesüra department-i market jenjang nung sen ya meshiang" ta zülü iba shiti telangzüba NO.CEL/TB/RTI-ESTT/2016-17/2552 Dated, Kohima the 7th October 2020 nung Chief Engineer (D&R) Department of Power, Nagaland: Kohima ajanga "Nüburtem nem meter box brand balala pei sasa alia mamshidaktsübaji light atsükba bill yangludang timtem ajurua lir ta sür temelaba magütsür" ta shia lir, anungji ya Kohima Municipal Council rate den meputepba tashi putepa yanglushidaktsütsü asüngdangtsü, kechiyong jang 50 kg bag süngla labour charge sen 5 nung koda sür meter box seret ka shi sen 129 agi bendaktsütsü, tang Dimapur nungi Kohima-i 50 kg jang bag ka abenba transport nung sen 70 agir süra kechiba meter ka asoshi sen 159 agütsütsü? Single Domestic LT Consumer meter, Power Department-i jenjang latetbaji yamai liasü; Material cost- Rs 2964, Labour charge 445, contingency charge-89, transportation charge 149, storage charge-149, total 3796 (saka bill nungbo 3793 dang sayur) iba den ano total connection charge-494, load security deposit- 250. Saka iba kasa mapang brand balala asutsüa akok ibaji market nung sen 500 shi agi ngua liasü.
3. Rural Development Department; RD Department-i langzüba RTI DRDA/MKG/RTI-1/2009-10/431 Dated Mkg the 15th September 2020 nung shia aliba agi IAY (tangbo PMAY ta melenogo) kibong ka asoshi total amount of the project-ji 75,000 ta shia lir iba jaki injung unit ka agütsüba sayua lir, ibaji kum pezü pungu tejaklen lir, ajisüaka ibaji tang Changtongya town nung retail price süngla unit ka jenjang yamai lir; 20mm- Rs 2800, 22mm- Rs 3400, 28mm- Rs 4200, 30mm- Rs 5200, 35mm- Rs 6200, Department-i oset tajungtiba magütsür, saka asenoki department meima oset tajungtiba nung inyakdangra 1 unit = 7 bundle x 6200= 43,400 dang adoker, injung ya kum shia jenjang timba dang akümer. Tang PMAY nungibo kibong ka asoshi sen 1,30,000 lir, anungji iba osang sangdongba nungibo PMAY nungi oset/sen shitak magütsüra ibaji department-i onok mesüra nübur den raratsü odia jazükba mapa ka ta züngshitsü. Ano MGNREGA scheme RTI Act agi melaba ama 1st April 2020 nungi 31st March 2021 tashi inyakba inspection arutsü, ibaji Mokochung district kübok yim asem onoki shimtsü aser temulunger council/kaketshir/nejia shirnoki par yimdak inyakba reprangdaktsünür yim asem onok jaoktsü akok.
4. Urban Development Department; Kum aika Urban Development Department ya Kohima aser Dimapur nung dang sen ajak ama indokba angur, DUDA-i Eastern Nagaland ajak reprangba den Meluri Area (Phek), Aghunato Area (Zhunheboto) Bhandari area (Wokha), Peren district ta reprangdar, tanüngba Mokochung, Wokha, Phek, Zhunheboto asoshi ano department ka tenzüksüla mesüra temelatibaji Department tajung kati item District pezü nung dang sen timba indoktsüla.
5. DUDA; Directorate of Under Developed Area RTI NO.DUDA/RTI-256/08/part-III Dated Kohima, the 15th June 2020 nung ashiba agi department-i solar light aliba aser installation nung 2015-16 nungi 2018-19 tashi nung sen 627.64 lakh indok, saka ya sensakeri shishilembar ajangzükdaktsütsü asoshi sen timba indoktsü sentong yangluba ka mesüka liasü. Kechiyong New & Renewable Energy nungi iba mapang ya 1st phase Rs 6800 shi aser 2nd phase Rs 9300 shi ta agi subsidise nung agütsü, yangji transportation aser installation ajak densema liasü, saka DUDA puri aliba solar light ka jenjang 1,02,430 sayua lir, aji transportation aser installation densema. DUDA ajanga 2015-16 nungi 2018-19 tashi nung inyakba tongtibang kar shinür.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



## Laishiba nung shia aliba ama ayawara arutsü: World Food Program



July 23, 2019 nü World Food Programme Executive Director, David M. Beasley (tiyong) aser US Ambassador, Kip Tom nati South Sudan semdangba mapang tangokba noksa nung angur.

**January 07, 2021:** World Food Program Executive Director, David M. Beasley-i, alima nung ayawara arutsü indang Laishiba nung shia aliba ama 2021 küm ataloktsüa akok, kechiyong rara aser kiralongra tebilemtsü aliba den külemi süngkoi alu nung chiyungtsü jenti chitsüba mapang nung coronavirus wara ajanga alima rongsenkettsüing jenjang tamajungba kümdaktsüogo, ta ashi.

Yaküm interview ka agiba mapang nung taoba mapang South Carolina nung Governor aser tang World Food Program Executive Director teinyakdak, David M. Beasley-i 2021 küm senotsü tsütsü timtem kanga ajurutsü, ta lemsatepa liasü.

Arrshi küm 63, Beasley-i, coronavirus wara ajanga funding tsütsü timtem ajurutsü aser alima nung nisung million 270 shi chiyungtsü agi anüngtsü, ta ashi.

"Ni WFP nung adenba mapang nung chiyungtsü agi anüngba nütsüing million 80 dang liasü. Iba nungji technical oren ka lir. Ajisüaka nütsüing million 80 ayawara tia ajurutsüsa liasü," ta paisa metetdaktsü.

"2019 küm tatembanglen tashi nungbo chiyungtsü agi anüngba nütsüing million 135 tashi aküm, aser ibaji nisungi sayangtetba rara den külemi alima tsüngküm-mongpu melenshiba mesüra sorkartem tashi maitba kulitem ajanga lir. Iba dak alia tongtibangtibaji coronavirus wara poktetba ajanga lir, koba ajanga rongsenkettsüing jenjang ano tamajungba kümdaktsü. Coronavirus wara ajanga tangbo nisung million 270 shi ayawara tia-i aitsüsa lir," ta pai ashi.

Yaküm April ita tashi nungbo alima tesem balala nung sorkartemi iba war nokdangtsü atema asalentong yanglua inyak.

UN Security Council den jembidang Beasley-i, wara ajanga senotsü lenmang ajema kümogo, aser ibaji ajanga Laishiba nung shinzüka aliba ama taruba ita ishika tsüingda

tesem-tesem nung ayawara arutsü, ta metetdaktsü.

"Iba dang nungjagi-a tamajungba asütsüa akok. Laishiba nung shinzüka alibaji nai koma rateta agir, iba dakji keta lir," ta Beasley-i ashi.

"Asenok nem senotsü teyari balaka agütsü mesüra 2021 küm ya kanga majung asütsü. 2019 küm tatembanglen ni, World War II sülenbo 2020 küm ya tamajungba asütsü, ta jembia liasü. 2020 küm matongdang lisem lima nungi süngko jenti arua alu nung aonsotsü raksatsü, iba sülen coronavirus wara pokteta liasü," ta pai ashi.

"Onok menungitra aser alima linüktemi-a mera agia meinyakra laishiba nung shin-a aliba ama ayawara tulu alitsü, sorkartem tashi maittsü aser nisungtemi tesem melenshia alitsü. 2020 küm alima linüktemi mera agia inyak, aser ibaji junger aser asenoki ayawara-a nokdangteta liasü," ta World Food Program tongti-isa metetdaktsü.

WFP-i senotsü teyariji alima linüktem sorkar nungi angur aser nijatem dang nungia teyari angur. 2019 küm WFP-i linük 88 nung nisung million 97 nem teyari agüja liasü.

"Rongsenkettsüing jenjang junga liasü aser budget junga liasü. Ibaji osang tajung ka liasü, saka iba sülen coronavirus wara tenzüik," ta pai ashi.

November ita nung Beasley-i US nung lenirtem, White House aser State Department nungi ketdangsertem ajurua alima tensa tebilemtsü atema lemsatepa liasü.

Beasley-i, tensa balala nung Yisu Khristai yimjung hadir atema chiyungtsü amshia liasü, ta ashi. "Alima tesem ajungalen yimjung hadir ka ama onoki chiyungtsü amshir aser onoki Washington nunga chiyungtsü amshio. Ibaji ajanga yangi mapa inyaktetra tangalen-a mapa inyaktettsü," ta pai ashi.

2017 küm Beasley WFP nung Director akümiba mapang nung küm ka atema budget ji US sen billion 5.9 shi liasü aser iba nungjagi US nungi anguba

senji billion 2 den tajemba liasü. WFP-i 2019 küm nungbo sen billion 8.4 dak tema bendentet aser iba nungjagi sen billion 3.5 bo US nungi anguba liasü.

"Onoki Germany aser UK na densema tanga linüktem dang nungia senotsü teyari nguogo," ta pai ashi.

2019 küm WFP-i aya-tzüra tia nung aliba nisung million 100 nem teyari agütsüogo. WFP-i alima nung aya tzüra tia nung aliba nüburtem yariba aser rara adoka aliba tesemtem nung yimjung alitsü atema meranga inyakba atema 2020 küm WFP nem 2020 Nobel Peace Prize agüja liasü.

WFP nem Nobel Prize agütsütsü lemtetba osang pa nem metetdaktsüba bilemteta pai, "Ni kecha mejembiteti liasü. Iba anogo nungji ni Niger nung liasü. Iba anogo nungji ni mission field nung liasü aser tesem ajaklen kiralongrartem liasü. Kiralongrar teloktem nung anioktsü atema parnoki chiyungtsü ya hadir ka ama amshir. Nisung kar arua kü dang 'asenoki kokogo' ta ashidang ni mezüngbu mamangi liasü," ta ashi.

2020 küm ayawara ajurubaji East Africa aser Middle East tesem aika nung lisem lima nungi süngko jenti arua alu nung chiyungtsü chireptsüba ajanga liasü.

Taoba ita U.N. Food and Agriculture Organization-i, maneni süngkoi northern Kenya nung timtem agütsütsü aser Temerem tzyüim tip anatsülen süngko poktettsü, aser ibaji ajanga Eritrea, Saudi Arabia, Sudan aser Yemen linüktem nung timtem agütsütsüa akok, ta metetdaktsüogo.

Nisung million aikati ayawara ajurutsüsa aliba tensa ka nung Mathi tapu 25 nungi Lai o tetshia Beasley-i, "Meimchir ajakji Tsüngrem mesükba nung yanglu. Ajisüaka meimchirtem dang temeim mesayura asenoki ajak takoksa Tsüngrem magizüker. Nisung ajakji kasa aser alima nung alir ajak chiyunga alitsü temeden lir," ta ashi.

## ANOGO ABEN TSÜNGREM DEN

### Temeneni asenok sotaker Ibri 12:1

Temenenji asenok Khristan taküm rajang kümdaktsüba tsükchir tamajungtiba lir. Tsüngremi asenok asoshi tajungtiba yangluba temeni bener aotsü bushir. Pauli asenok temeneni tasüba adokdaktsür ta ashir (Rom 7: 11). Ibai kanga tekülak. Asenoki meimlaba mapang nung temenen asenok dangi aiter. Ibai tepuatsü aketba talep ka lir aser iba yagi kecha tamajung meinyaktsü ta bilemdaktsür (2 Kor. 11: 14-15).

Temeneni tesüngjem agi asenok dak sotaker. Asenok temenen agi soeta ali tashi koba alizüing atongtsü tim aji kodanga matongtsü. Asenok sasa temenen talenba nungi nüji süa alitsü asoshi ibai angatettsüla. Temenenji "aibelenba" ka dang, "Yimya tamajung" ka, mesüra "tashi mait" ka dang shira asenoki iba tesoetba nungi kodanga jenbua malitsü. Asenoki asen temenen asoshi tangar dak matongtsüla. Temenen nangzükbaji kanga tilutsüba mapa ta asükümi ashiba jagi asenok mokokdaktsütsüla. Pa alibaji memetetdaktsü temeneni asenok tenük pokdaktsür. Iba yagi kodanga ozüing magütsür saka tekülak agi asenok nungi tanelaren ain aser asenok meyong takokji asenok nungi rakzüka bener aor. Osangtajungji temeneni yimsü masütsü asoshi kong temenen jenti adok idakji taochi kanga aren (Rom 5: 21).

Temeneni ne tepela rakzüka ali asü? Ibai kinüngpu tajung asütsüba, kinüngtsü tajung asütsüba, jabaso, jala mesüra temba tajungtiba asütsüba soeta ali asü? Na temeneni soeta lira, Tsüngremi na yakta chiokdaktsütsü akok.

## Lahore yimti nung jenshiba Khristantem tanaben meyipa aruogo

**January 07, 2021:** Taoba ita Muslim nungeri amokmerenba agi Pakistan kübok Lahore nung Khristan kibong aika jenshia liasü, ajisüaka police-i security agüja Khristan kibongtem pei kidangi tanaben meyipa aruogo, ta International Christian Concern (ICC) osang ajanga metetdaktsü.

K e t d a n g s e r t e m i Khristantem dang shingaia nenok mamaktsü mesüra nenok anema meinyaktsü, ta nangzükogo.

Tensa tamajung nokdangtsü atema Charar kiyong nung police aika yoka lir aser Khristan aika tanaben pei kidangi shilangogo.

Taoba ita Lahore kübok Charar nung Pastor kati social media nung ocet ka lemsatepba sülen Muslim nungertemi iba ocetji ashishia liasü, aser Khristantem amokmerenba ajanga parnoki pei ki toktsür jena kinünger aser medemertem kidang jenoka liasü.

Tamalen ICC den jembidang Charar nung Khristan ka tenüing agi, Saleem Khokhar-i, "Pastor Raja Waris-i December 22 nü tamangba yimsü dak sendakba

ocet ka Facebook nung lemsatep, aser Muslim nungeri iba ocetji ajanga parnok melung yirutsüogo ta ashi. Iba ocet lemsatepba atema pastor-i takok meshiba sülen tasüngnü iba mangatettepji benteta liasü," ta metetdaktsü.


Social media nung tamangba yimsü dak sendakba ocet lemsatepba ajanga mangatettep adokba ken o jibo benteta liasü saka Muslim nunger 100 dak temai Khristantem amokmeren aser pastor Waris tekolak tangzüka lepsettsü, ta sangdonga liasü.

Muslim nungeri Khristantem ki rongdoktsütsü asalentong yangludarr, ta osang angazükba sülen tensa tamajungba küma Khristantemi iba kiyong toktsür jena liasü.

ICC Regional Manager, William Stark-i, "Charar tensa atema ICC-i tebilemtsü akar. Onoki Pakistan nung ketdangsertem dang Charar nung aliba Khristantem ki kümzüka ayutsü atema mepishir. Social media nung ocet ka lemsatepba nung ajemdaker Khristantem anema meinyaktsüla," ta mepishia liasü.



## OLONG PAITEP # 5687



## TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S \_ \_ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

## LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

## OLONG PAITEP # 5686 TELANGZÜBA

## TIPIEN :

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

## LANGTSÜNGLEN :

2. Anga, 3. Yabang, 4. Tarok, 5. Orak,
8. Ainer, 9. Anema, 10. Jabili,
11. Among, 12. Miim, 13. Anem.

## Agüja aliba noksa nung meputepi aliba bushiang



## TANÜBO NAI LANGZÜANG

Q. Kochi - Mangaluru Natural Gas Pipeline ya \_\_\_\_ ajanga yanglutsür.

- A. GAIL B. BHEL C. GoI D. None of the above

===== (Taruba adok nung onoki langzünsü)

YASHIADOK TELANGZÜBA : China

## Happy Birthday

TENÜNG : NIKITO (SENTI)

Tasoba anogo : Jan. 8

Küm : 1

Talidak : Shokhuvi Ao Colony, Dimapur

Tsüngremi jabaso taküm küm ka (one) tashi len aniba asoshi Tsüngrem tenüing as anger. Tsüngremi Baby Toto arishi talang moajang ta sarasademtsür.

- Temeim Oja, Oba & Kinungertem.



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

## Tepela Tasoba Anogo



1. Tenüing : .....
2. Tasoba anogo : .....
3. Küm : ..... 4. Class : .....
5. School : .....
6. Talidak : .....
7. Salem osang : .....

## NAI-A YA METETTER MA?

## ODI CRICKET NUNG TAKARABA RUN 10000 TAKARATIBA YANGLUR ASAYARTEM

- #1. Virat Kohli (205 Innings)
- #2. Sachin Tendulkar (259 Innings)
- #3. Sourav Ganguly (263 Innings)
- #4. Ricky Ponting (266 Innings)
- #5. Jacques Kallis (272 Innings)
- #6. Mahendra Singh Dhoni (273 Innings)
- #7. Brian Lara (278 Innings)
- #8. Rahul Dravid (287 Innings)
- #9. Tillakaratne Dilshan (293 Innings)
- #10. Kumar Sangakara (296 Innings)
- #11. Inzamam Ul-Haq (299 Innings)
- #12. Sanath Jayasuriya (328 Innings)
- #13. Mahela Jayawardene (333 Innings)

## SUDOKU # 5728

|   |   |   |   |   |   |   |   |   |   |   |   |   |   |   |   |   |   |
|---|---|---|---|---|---|---|---|---|---|---|---|---|---|---|---|---|---|
| 1 |   |   | 3 | 5 |   |   | 2 | 9 | 1 | 7 | 3 | 6 | 8 | 2 | 5 | 4 | 9 |
| 3 |   | 6 | 8 |   |   |   | 1 |   | 2 | 4 | 9 | 1 | 5 | 7 | 3 | 6 | 8 |
|   |   |   |   | 9 |   |   | 4 |   | 5 | 6 | 8 | 9 | 3 | 4 | 7 | 1 | 2 |
| 9 | 6 |   |   |   | 4 |   |   | 3 | 3 | 8 | 7 | 5 | 2 | 1 | 6 | 9 | 4 |
| 5 |   |   |   |   | 9 |   | 7 | 1 | 4 | 9 | 1 | 8 | 6 | 3 | 2 | 7 | 5 |
|   | 3 |   | 5 | 2 | 1 | 9 | 8 |   | 6 | 5 | 2 | 7 | 4 | 9 | 1 | 8 | 3 |
|   |   | 4 |   |   | 8 |   |   |   | 7 | 3 | 5 | 4 | 1 | 8 | 9 | 2 | 6 |
|   | 1 |   |   |   | 5 |   |   |   | 8 | 1 | 6 | 2 | 9 | 5 | 4 | 3 | 7 |
| 8 |   | 9 |   | 7 |   |   |   | 5 | 9 | 2 | 4 | 3 | 7 | 6 | 8 | 5 | 1 |

## TELANGZUBA # 5727

## OJANG LUTEP # 5275

- MTTIEM :
- URKHET :
- ADARUNG :
- MTEMTESÜISÜ :
- MAA :
- EMEBILR :
- GASHDANI :
- TYAKA :
- ANDG :
- ERADOSÜK :

## OJANG LUTEP TELANGZÜBA # 5274

TEMBAR YONGTSÜ NUNG TAREMZÜK MAKAI  
TOKTEPDANG TANGAR TAJANGZÜK ANGÜTSÜSA AKÜMER



## Aluyimertem longkak aitba tesem nung wara meproksüla: SC



January 07, 2020: Brihostibarnü Haryana-Delhi arrtsülen Jhajjar district nung Haryana nungi aluyimertemi aluyimba ozüng tasen anema tractor rally nung shilem agiba noksa nung angur.

**New Delhi, January 07 (Agencies):** Brihostibarnü Supreme Court-i Centre sorkar dang, yaküm küm tetenzüklen coronavirus wara kanga prokba mapang Muslim nunger Nizamuddin Markaz senden aliba tatalokba nungi nenoki kechi angazük, ta asüngdang.

Tekümdangtsü mera benoka meinyakra kasa tensaji ajurutsü aser aluyimertemi longkak aitba tesemji wara prokba tesem kümdaktsütsü, ta SC-i metetdaktsü.

Delhi arrtsülen tesem balala nung aluyimertemi longkak

aitba tetshia Chief Justice S.A. Bobde-i aniba bench-i sorkar tenüng nung jembir Solicitor General, Tushar Mehta dang, "Kechisa atalokdar, ibaji nai ashitsüla," ta ashi.

Justices- A.S. Bopanna aser V. Ramasubramanian na densema aliba bench-isa, Delhi arrtsülen longkak aiter aluyimertemi wara nokdangtsüsa tekümdangtsü beshidar ma?, ta asüngdang.

Ibaji langzua Solicitor General-i, wara nokdangtsü atema kecha meinyaker ta ashiba sülen SC-i, yaküm Delhi

nung March ita nung Nizamuddin Markaz senden nung atalokba ama aluyimertem longkak aitba tesem nunga kasaji ataloktsü, ta ashi.

SC-isa Centre sorkar dang wara nokdangtsü atema tang tashi nung kechi inyaka lir, iba osangji agüjang, ta tuyu.

Supriya Pandita-i advocate Omprakash Parihar ajanga agütsüba temepishiba ken o nung SC dang, lokti tulu (aluyimertem) adenshitsü melaba nung Centre, Delhi sorkar aser Delhi police-i kechi shilem agia lir, ta asüngdanga lir.

## Sorkari Rajasthan, MP, HP aser Kerala states nung bird flu jangjaogo

**New Delhi, January 07 (Agencies):** Fisheries, Animal Husbandry & Dairying Ministry-i Rajasthan, Madhya Pradesh, Himachal Pradesh aser Kerala state tem nung Bird flu, ta ajaba Avian Influenza jangjaogo, ta osang ka ajanga metetdaktsü.

Item state tem nung Indian Council of Agricultural Research -National Institute of High-Security Animal Diseases (ICAR-NIHSAD)-i samples tendangba ajanga bird flu jangjaba sülen Ministry-i iba osang ya metetdakja liasü.

Sorkar sangdong ja ajanga, Rajasthan kübok Baran, Kota aser Jhalawar district tem nung aliba warotem dak iba tashidak aliba jangjaogo aser Madhya Pradesh nunga Mandsaur, Indore aser Malwa districts nung aliba warotem dak iba tashidak aliba jangjaogo, ta metetdaktsü.

"Himachal Pradesh kübok Kangra nung tangalen nungi aruba ozütem dak iba tashidak jangjaogo aser Kerala nunga Kottayam aser Allapuzha district na nung padak farm nung iba tashidak aliba jangjaogo," ta kasa sangdong nung shia lir.

January 1, 2021 nü Ministry-i iba tashidak meprokdaktsütsü

atema Rajasthan aser Madhya Pradesh state na nem metetdakja liasü.

"Madhya Pradesh aser Rajasthan na nungi report anguba sülen National Action Plan of Avian Influenza telatetbatem kübok mera agia inyakdar. January 5, 2021 nü Himachal Pradesh dang iba tashidak prokba nokdangtsü atema inyakang ta metetdakja liasü. Kerala-ibo January 5 nungi tenzuka iba tashidak nokdangtsü atema inyakdar aser padak aika tepseta indokdar," ta kasa sangdong nung shia lir.

Ministry-isa New Delhi nung control room ka amenoker iba tensa mita reprangdar.

Mongolbarnü Kerala nung Forest, Animal husbandry & Dairy development Minister, K Raju-i, state nung padak 12,000 shi süogo aser bird flu aliba region nung padak 40,000 shi tepseta indoktsü," ta metetdakja liasü.

Madhya Pradesh nunga Animal Husbandry Minister, Prem Singh Patel-i, district 10 nung waro 400 jungnüa asüba sülen iba wara nokdangtsü atema inyakdar, ta metetdaktsü.

Centre sorkari tanga state

## Mulungnen O



Asür. MEYIKABA JAMIR  
10:02:1936 - 04:01:2021

Onoki teti meima aliba asür **Meyikaba Jamir**, pa iba akümüli nungi pila orr onok mangyima aser tejashi tia nung alidang, shirnokisa onok dang temeim sayua, nübo, sarasadem aser mapa tajung ajanga onok nungita yariogo, nenok ajak dang kinungertemi pelaba metetdaktsür.

Tajungsang Tsüngremi nenok ajak talubosa moajangma ta ozü sarasadem.

*Temeim Kinungertem.*

## Delhi nung yimsüsürtemi Rahul Gandhi tsübur: Shiv Sena

**Mumbai, January 07 (Agencies):** Rahul Gandhi ya tongbang nung junga rarar ka lir, kechiyong pai Modi sorkar anema nokdaker, ta shia Brihostibarnü Shiv Sena-i, Delhi nung yimsüsürtemi Congress lenir (Rahul) tsübur, ta ashi.

Shiv Sena-i, "Delhi nung yimsüsürtemi Rahul Gandhi tsübur. Yamaji masü asübo Gandhi kibong tenüng menüksütsü atema asalentong yanglur meinyakla," ta ashi.

Rahul Gandhi tenüng sanga Shiv Sena-i, "Kijai yimsüsür katia nisung kati pa anema nokdakba tsübur. Kijai tongbang nung nokdakaka pa ochishia lira pai tangar tali tsübudaktsür.

Delhi nung yimsüsürtemi Rahul Gandhi tsüburaji iba denji kasa lir," ta ashi.

"Rahul Gandhi ano maneni Congress Tir akümtsü alibaji junger. Narendra Modi melentsüsa BJP nungi nübo mali aser Rahul Gandhi melentsüsa Congress nungi nübo mali, ta ajaki agizüktettsüla," ta Sena-isa metetdaktsü.

"Rahul Gandhi ya tashimait lenir ka, ta jembitsüyonga pa maneni nokdaka lir aser pai maongka angu shia sorkar aitsür. Mapang ka nungbo opposition-i mitsü nungi nokdaktsü," ta parnokisa metetdaktsü.



January 07, 2020: Brihostibarnü Amritsar anasa Chabba yimdak an farm ka nung nisung kati an nem chiyungtsü agütsüba noksa nung angur. Kidanger state Himachal Pradesh nung Bird Flu ajanga an aser ozü aika asüba sülen Punjab sorkari tekümdangtsü metetdaktsüogo.



## PM Imran-i Shia Hazara lokti dang tasü mang aremtsü mepeshi

**Islamabad, Aenjeti/January 7 (Agencies):** Pakistan Ato Kilonser Imran Khan-i Bodhbarnü, longkak aita aliba Shia Hazara lokti nungi züngsemtem dang Islamic State kiralongrartemi Balochistan province nung nagmati atur 11 tepsetba tasü mang aremtsü atema mepeshia asü ngdangba den pai takaratiba nung parnok semdangsü nangzük.

Shia Hazara lokti nung nagmati aturtem ya Islamic State kiralongrartemi Deobarnü pua bener oa province kübok Machh tesem nung khaset.

Asür kinungertem aser par lokti nungi züngsem noklang aika sentepa Deobarnü nungi longkak aita arudar.

Parnoki province yimtiba Quetta Bypass tesem nung tasü mang süngden den külemi longkak aita arudar aser ashiba agi, Ato Kilonser-i tsü ngdong arua parnok nem tekü mzü kba agü tsü tsü ta nangzükba sü lenang tasü mang aremtsü.

Shia lokti nungi züngsem noklang aikati Karachi nunga longkak aitba sentong

ayongzükdar.

"Ni nenok den asü khu lemsateper aser taoba mapang nunga nenok timtem nung aliba mapang nenok den nokdakogo. Ni takaratiba nung tsü ngdong arua sarasadem agü tsü tsü aser asür kinungertem den asü khu lemsateptsü. Nüburtemi tamang akaba ni kodanga mashioktsü tsü. Yimlibilema nenok temeimbatem tasü mang remang, aji ta asü nung dang parnok tanü la tesunep nung anisü ngzü ktettsü," ta Khan-i tweet asü.

"Machh nung kiralongrartemi amakba mapang takü m samaba Hazara nunger kibongtem dang ni nenok timtem aser takhangba angateta lir ta jangjashitsü ner. Tarutsü nung iba amala lendong nungi jenbotsü atema onoki jenjang agidar aser asen kidangeri sectarian terrorism ajungmesor ta meteta lir," ta Khan-i tanga tweet ka nung ashi.

Khan-i, minister for shipping Ali Zaidi aser adviser on Overseas Pakistanis Zulfi Bukhari na longkak aiterem den ajuruteptsü yokogo.

Khan-i yokba minister ana

yagi Balochistan Chief Minister Jam Kamal Khan den külemi longkak aiterem den ajuruteper aser parnok dang longkak aitba anentsü mepeshi. Parnokisa tasü mang aremtsü aser iba ken o ya PM-i parnok mesemdangba den sendaktepa metoktsü tsü mepeshi.

Chief Minister Khan-i, temzü ng ozü ng ya provincial sorkar khuret lir ta ashi aser pai iba amala lendong nokdangsü atema takok tashi inyaksü aser lendong bener arutsürtem aputsü nangzük.

"Pa (Ato Kilonser) kechisü dir sü aka arutsü aser Tir o minister aser parliament züngsemtema arutsü. Ato Kilonser aruaka asenok tebilem sübo asenoksasa bentettsü sa akü mtsü," ta pai ashi.

Lendong bener arutsürtem aputsü atema police temi tesem aika meitaogo.

Kasa mapang nung Shia political party Majlis-i-Wahdat-i-Muslimeen (MWM)-i Karachi nung Macch nung asürtem nem akhü mttetushi agü tsü tsü sayutsü atema longkak aitba sentong ka ayongzükba agiogo.

## Afghanistan anü olentip nung nisung 11 tepset

**Kabul, Aenjeti/January 7 (Agencies):** Afghanistan anü olentiplen tesem ana nung civilian aser security forces 11 tepsetogo, ta ketdangsürtemi Bodhbarnü metetdaksü. Qatar nung yimjung atema sorkar aser Taliban na tsü ngda jembishinü tenzü kshitsü atema jembitepa aliba mapang tang iba lendong atalokogo.

Uruzgan province nung Brehostibar anepdang gari nung bomb inoker arua military base ka anasa pokdaksü aser security force trok tepset, ta provincial council züngsem kati ashi.

Uruzgan nung provincial council, deputy head Mohammad Karim Karimi-ia, Tirin Kot nung military base ka amakba osang jangjashitsü ogo, saka tasü ba osang tejangja magü tsü. Pai ashiba agi, bomb kanga sashia apokba ajanga yimti

dena anakshidaktsü ogo.

Kasa mapang nung Helmand province nung Bodhbarnü aonung Lashkar Gah tezülen tayimtsü amshia amak asü tsü ta temulung melembi bilemba ken o ka nung civilian pongu asü aser nisung pongu yirua liasü, ta provincial council tekolakba Attaullah Afghan-i ashi. Paisa, asürtem rongnung tanur aser tetsürtem densema liasü, ta ashi.

Provincial governor, Abdul Nabi Elham-i ashiba agi, ketdangsürtemi tayimtsü amshia amak asü masü aji jangjatsü atema bushitsü ngdangdar.

Tang tashi nung iba lendong bener arutsü indang telok kati danga nangzükba mali.

Afghan negotiating team tang Qatar yimtiba Doha nung yimjung atema sensaksem tenzü kshitsü atema oa aliba mapang linük nung azütokshi tali kü mogo.

## US Congress-i Biden shimogo; Capitol Hill nung rongrong adok

**Washington, Aenjeti/January 07 (Agencies):** Tir Donald Trump busemer noklang aika US Capitol nung adenshia America nunger democracy mezü ngmeshir ghonda ishika lir atentenseta Congress ajanga Brehostibarnü Democrat Joe Biden-i US tir election nung takok nguogo ta kuli agü tsü.

Iba sü len Trump nungi sangdong ka White House ajanga agü tsü, kong Biden-i January 20 nü tenangzükba agidang timi mapa melenoktsü tsü nangzük, saka November election nung pai kokogo, ta tiazü jembiba manener. Bodhbarnü Republican tiri pa sü len anidaker dang Capitol nung adenshitsü ajungshi amai yimya kar sayua liasü.

Capitol Hill nung rongrong adokba sü len Biden-i Electoral College nung takok anguba kuli agü tsü tsü atema Congress-i maparen nikongdang tenzü k. Brehostibarnep tashi atsü langa o intepba sü len Senate aser House of Representatives ajanga tai apuba ana magizük aser Electoral College vote tatembangba nung tembang, kong Biden-i vote 306 aser Trump-i vote 232 nguteta liasü.

Vice President Mike Pence-i tatembangba vote bendener sangdongba mapang, "iba ya United States atema tir aser tatong tir shimteta alir sangdongtsü atema teperi," ta ashi.

Vice President inyaksü shimteta alila Kamala Harris aser Biden na külemi mapa agizüktsü.

Biden-i takok nguogo ta kuli agü tsü tsü atema shisabulu



U.S. Vice President Mike Pence (tesülen abelen) aser U.S. House Speaker Nancy Pelosi (tesülen achichi) nunger January 6, 2021 nü Washington, D.C. nung aliba US Capitol nung 2020 tir election nung takok angur nem kuli agü tsü tsü atema Congress senden amenba nung shilem agidang tangokba noksa nung angur. Tir mapa yutsü tsü alisang Donald Trump busemer tem Capitol telungi ia timtem agü tsü tsü ajanga ghonda ishika inyakyim thitemba sü len U.S. Congress ajanga Joe Biden-i tir election nung takok anguba kuli Brehostibarnep agü tsü.

meliasü, saka Capitol telungi aittsü meranga rongrongshironger temi metal security barricades alema aita window tem raksatsü aser jara alema ait.

Iba rongrong nung nisung pezü asü, ka prangbong agi akhaba zübu agi aser asem medical emergency nungi, aser nisung 52 apu, ta police temi ashi.

Ozü ng yanglurtem telung nung lia nisung kari House chamber tonga aita kishi nung akoshi aser o intepba thitemtsü sa akum. Sepaitemi chamber indang kishi nung menden amala oset bener arua nangden aser pistol tem agiteter lia ozü ng yanglurtem aser

dangartem iba tesem nungi ainshidaktsü.

November 3 election nung ashikülak mapa inyaka lir aser iba election nung tamakok ajuruba melendaktsü tsü asoshi yariang, ta Trump-i pa busemer dang ita aika ajungshia arurba Capitol nung tembanger.

Congress ajanga Brehostibarnü kuli agü tsü tsü sü len pai White House nung ketdangsür Dan Scavino ajanga sangdong ka agü ja liasü.

"Ni election result khenyongi magizükaka January 20 nü timi mapa melenoktsü tsü," ta Trump-i ashi.

Trump-i White House anasa pa busemer meyirijang aika den jembia parnok dang ozü ng

yanglur dang jashiba sayua Capitol-i aotsü ashiba sü len Bodhbarnü rongrong ya adok, shibai election magidanga takok mongura timi mapa melenzü ktsü tsü atema jembitsü memolungi liasü.

Pai pa busemer dang shimteta aliba ketdangsür nem November 3 election result magizükdaksü tsü ajungshitsü ashi aser parnok dang iba atema raratsü ajungshia liasü.

Congress nung Republican nungi nübu tejangja kari Bodhbarnü asü dokshi ya pa mapa, ta tenü ng senogo.

"Tiri lokti ya tentetdaksü, Tiri lokti adenshidaktsü, Tiri lokti den jembia. Pai mi jangrudaktsü," ta House Republican Conference

Chairwoman Liz Cheney-i Twitter nung ashi.

Senate nung Republican lenir Mitch McConnell-ia Capitol-i aiterem ya yar, tekolok meshidak tem, ta ashi.

Election nung takok anguba atema kuli agü tsü tsü nokdangsü atema Pence aser danga Republican tem nem akok tashi inyakdaksü tsü Trump-i kanga merang, ajisü aka yamaji inyaksü atema parnok nem constitution ajanga tashi agü ja mali.

Pai aginü ba ama Pence-i meinyaksü ta metetba sü len Trump-i Twitter nung pa tembar aitsü aser Senate nung rongrong adokaka tatong tiri anir senden mena aliba mapanga pa aija liasü.

Trump-i tamendak dak kuli tejangja magü tsü tsü ashikülak mapa inyak ta jembia America nunger mesüzüktsü merangba busema arur Republican kar iba rongrong ajanga temolung melenshia akum aser tai aputsü ta shia aliba Republican senator kar temolung melener chamber-i meyipa aru.

Arizona aser Pennsylvania nung vote azü ngba nung tai pua aliba House aser Senate nung magizük.

Congress nung Trump busemer tejangja, Senator Lindsey Graham-ia külem Republican temi tai apuba magizük.

Senate indang floor nung Graham-ia, "Ni ashitsü ajak agi ni tezü ngok. Ojang ji ojang. Joe Biden aser Kamala Harris ya ozü ng agi mela shimetba lir aser January 20 nü United States indang tir aser tatong tir akumtsü," ta ashi.



# Lava Z1, Z2, Z4 aser Z6 sayaogo



**New Delhi, Aenjeti/January 07, 2021 (Agencies):** Brehostibarnü, India indang tech company Lava-i Lava Z1, Lava Z2, Lava Z4 aser Lava Z6 ta nüngja agütsüba smartphone tasen pezü India nung sayaogo. Smartphone pezüprongla jenjang sen 10,000 tekübok alitsü aser shishilembadak nüngtugu brand talisa Xiaomi, Nokia, Motorola aser tanga indang budget smartphone tem den tokteptsü.

Sorkar indang Aatmanirbhar Bharat (self-reliant India) mapatong nung achaayangba company-i ashiba agi, Z smartphone tasentem ya India nung smartphone amshitsü jangrartem atema India nung yangluba device/product tem alitsü.

Lava Z1, Lava Z2, Lava Z4 aser Lava Z6 device tem nung MediaTek mobile processor inoka yanglutsüogo. Iba den bendenloksema, 'Proudly Indian' sentong agiba mapang, Lava-isa company meyong 'My Z' aser 'Z Up' programme tem sangdongogo. Iba program ajanga customer temi aginüba ama parnok indang smartphone tem customise süa amshitsüa maongka agütsür.

Item smartphone pezü rongnung entry-level Lava Z1 nung 5-inch display angutsü, koba Corning Gorilla Glass 3 protection malokja lir aser phone tezülen bezels inoktsüogo.

Company-i ashiba agi, feature phone melena phone tajungba amshitsü jangrar customer tem atema iba device yanglutsü. Phone ajunga ya Military Grade certification ajangetogo aser ibaji ajanga customer temi temulung lema

item device amshitetsü.

Lava Z1 nung tanga feature temji, phone tejaklen aser tesülen 5-megapixel selfie aser rear camera alitsü. Phone nung MediaTek Helio A20 SoC, 2GB RAM + 16GB storage aser 3,100mAh battery inoka yanglutsüogo. Iba phone jenjang sen 5,499 alitsü aser January 26, 2021 nü nungi tenzüka offline channel tem aser Amazon sabang ajanga alitetsü.

**Lava Z2 :** Display tulu den battery arishi talang aginürtem atema Lava Z2 yanglutsü. Iba smartphone nung 6.5-inch HD+ IPS display den 20:9 aspect ratio aser 2.5D curved panel inoka yanglutsüogo. Phone tejaklen waterdrop-style notch keta lir aser iba notch nung 8-megapixel selfie camera angutsü. Z2 nung octa-core MediaTek Helio G35 SoC - 2.3GHz ajanga maparen achaayangtsür. Handset tesülen, 13-megapixel primary camera den AI lens aser LED flash inoktsüogo. Iba smartphone nung 2GB RAM aser 32GB storage den külemi 5,000mAh battery angutsü, koba 10W fast charging aser ultra power saver mode support asür. Phone nung OS ji Android 10 Go out of the box alitsü aser osang ajanga angazükba agi device ya bloatware-free alitsü. Z2 smartphone ya sen 6,999 agi angutsü.

Kasa sentong nung, company-i 4GB RAM aser 64GB storage aketba Lava Z4 smartphone sayaogo. Z4 nung 6.5-inch HD+ IPS display den 20:9 aspect ratio, Corning Gorilla Glass 3 protection 2.5D curved panel inoka yanglutsüogo.

Iba smartphone tesülen, triple camera setup ka angutsü, kong 13-megapixel primary camera

den 2-megapixel AI depth sensor aser 5-megapixel ultra-wide-angle shooter densema lir. Security atema, handset tesülen fingerprint scanner inoksemtüsügo. Phone tejaklen waterdrop notch nung 16-megapixel selfie camera angutsü aser iba camera ajanga tesangwa peria malidak noksa jangja jangja tangoktsü atema bokeh mode aser tetracell technology den tanga feature balala inoktsüogo.

Lava Z4 nung octa-core MediaTek Helio G35 SoC aser 5,000mAh battery den Android 10 Go angutsü. Iba smartphone jenjang sen 8,999 alitsü.

Ano külen, Multitasking atema Lava Z6 ya smartphone tetemjen alitsü. Iba smartphone nung 6GB RAM lir saka Lava Z4 ama feature kasa angutsü. Iba den külemi display aser camera specification tem Lava Z4 ama alitsü. Z6 smartphone ya sen 9,999 agi angutsü.

Company sangdong ka ajanga angazükba agi, Lava Z2, Z4 aser Z6 smartphone ya January 11, 2021 nü nungi tenzüka Amazon aser Lava website ajanga angutsü.

Item smartphone dak alaka, Lava-i My Z mapatong sayaogo. Iba program ajanga user temi pei aginüba ama smartphone storage, RAM options, rear camera setup, front camera aser colour option tem customise sütetsü. Tejangrar customer temi sen tera talila inoksemer Lava Z2 smartphone ya 128GB storage option mesüra 6GB RAM tashi upgrade asütsü akok. Kasaji, My Z ajanga küm ka tsüngda user temi pei smartphone upgrade asütsü atema maongka agütsür.

## Forest ketdangsürtemi Darrang nung sung tsünga ayokertem apu

**Mangaldai, Aenjeti/January 7 (Agencies):** Forest department ketdangsürtemi Bodhbarnü Darrang district kübok Dalgaon tesem nung ozüing alema sung tsünga ayokertem apu.

Ketdangsürtemi mapang balala nung meita aoba mapang ozüing alema lapokba sawmills ana ngutet aser iba tesem nung sung aika bendena aliba apu.

Mangaldai forest beat office ketdangsürtem, Rangiya forest beat office

ketdangsürtem aser Darrang police longjemer iba meita aoba sentong ayongzüka agi.

Mangaldai forest beat office nungi beat officer Debabrata Sarma-i, "Ozüing alema sawmills lapoka inyaksangshiba osang angazükba sülen NK Division divisional forest officer-i onok dang Dalgaon tesem meita aotsü atema tetuyuba agütsü," ta ashi.

"Onoki Darrang police aser Rangiya forest beat office nungi ketdangsürtem teyari

agia Pub Batabari aser No 5 Baruajhar yimtsüng meita ao," ta paisha ashi.

Forest ketdangsürtemi sen lakh 1.5 alang sung pua liasü.

Ajisüaka tang tashi nung iba ken o dak sendakba nung nisung ka danga pua mali.

Osang ajanga ashiba agi, Botabari nung sawmill ya Soleman Ali meyong aser Baruajhar nung aliba sawmill ya Janak Teli-i achaaynger. Nisung anaprongla ya jena oadokogo.

## MULUNG NEN O



ASO :  
03.12.1960

ASÜ :  
28.12.2020

"Ni rara tajungji raraogo, ni alizüing tonga asemogo, ni tamangji yuogo." 2 Timoti 4:7

Ozü temeim kinungbo aser temeim obala **S. Among** (Longsa), akümüli nung tatsüka shiranga aliba mapang nungi tenzüka pa iba lima nungi pila orr lepkomong tashi nung kwinakati sarasadem, nübu, rongsen aser mapa tajung agi ozü mangyim jashi mulung sünepja yaritepogo, nenok ajak dang kanga pelaba lemsateper. Nenok temeim mapa atema ozüi meyipa agütsütsü kecha maka, saka Tulusang Tsüngremi nenok ajak moajangma.

**Temeim kinungtsü, chirnurtem, anükapang, semchir aser kinungertem.**

## Office of the Ungma Laishir Telongjem

Ungma, Mokokchung - 798601

### PELABA LEMSATEPER

Pastor Nungshisosang Pongen, Aliba Baptist Arogo nung Ao Baptist Arogo Mungdang (ABAM) ajanga 22nd November 2020 Deobar anogo ordained sütsüba atema Ungma Laishir ajak tenüng nung Ungma Laishir Telongjem Office ajanga Tsüngrem tenüng asangba den Aliba Arogo aser ABAM dang pelaba iba zülü ajanga lemsateper. Rev. Nungshi Pongen, kinungtsü Tainla aser jabaso Maongkar Tsüngremer wadang ano tali tayimjemba nung bendanga tenzüksü khure agizükba nung Tsüngremer tamoatsü lidakjangma.

**Sd/-**  
**Nokzenketba Jamir**  
**President**  
**Ungma Laishir Telongjem**

**Sd/-**  
**Moatemsü Jamir**  
**Secretary**  
**Ungma Laishir Telongjem**

## India nung Audi A4 sedan sayaogo

**New Delhi, Aenjeti/January 07, 2021 (Agencies):** Germany indang luxury car yangluba company, Audi-i India nung 2021 Audi A4 sedan sayaba sangdongogo. Audi A4 jenjang sen 42,34,000 (ex-showroom India) nungi tenzüksü aser trim option ana - Premium Plus aser Technology nung angutsü.

Technology trim jenjang sen lakh 46.67 (ex-showroom) alitsü. Tang Audi A4 ya generation pungobuba alitsü aser gari design tasen den engine tashi tuluba - 2.0-litre petrol engine inoka yanglutsüogo aser iba engine ajanga 190 hp aser 320 Nm torque agütsür.

Audi India, Head, Balbir Singh Dhillon-i, "Shishilembadak company indang takok ngua ayokba gari - Audi A4 indang version tasen ka küm tasenba nung sayatsü maongka anguba asoshi onok kangasa pelar. Gari ya generation pungobuba alitsü aser gari tereprangtsü akhüm taket den sporty temeyoktep lir. Iba gari nung technology tasen den feature tasen inoka yanglutsüogo. Iba mid-size luxury sedan segment yagi shishilembadak tanga den toktepa arudar aser iba sabang nung Audi A4 version tasenba yagi temelenshi tulu adokdaksütsü imlar," ta ashi.

Audi A4 gari yagi second 7.3 nung 100kph tashi kara aoer aser gari telung nung 460-litre boot alitsü. Iba model tasenba nung LED headlights den signature daytime running lights standard ama angutsü. Customer temi gari

ya Terra Grey densema sentüsü balala pungo nung angutsü. Kasa mapang, A4 nung Audi Exclusive Piano Black sentüsü aser Leather Leatherette upholstery tem inoktsüogo.

"2021 küm company ajanga ano gari tasentem sayatsü terenemba lir aser customer dang item product sayutsü asoshi onok yongyaseter. India nung company indang Petrol engine aketba gari asoshi asalentong tajung amenteter aliba mapang onoki EV mapatong tenzüksü asadangdar. Audi e-tron sayatsü asoshi onoki achaayangdar aser iba dak sendakba nung yakta osang metetdaksütsü," ta Dhillon-i shisem.

Feature tsütsü reprangdangra, A4 tasenba nung 25.65 cm MMI Central Touchscreen MMI Infotainment system den Audi Virtual Cockpit Plus aser Natural-language Voice Control keta aliba angutsü. Iba den külemi model tasenba nung keyless entry aser gesture-based boot lid opening function inoktsüogo.

Gari nung contour/ambient lighting package angutsü, koba interior atema color 30 nungi pei sapuba shimtetsü. Ano külen, smartphone atema Audi Phone box den wireless charging, Park Assist den parking Aid Plus, driver atema Power front seats den memory feature aser 3 Zone climate control feature bendenloksemtüsügo.

Maneni, powetrain atema iba petrol motor nung 12V Mild Hybrid System agütsütsü, koba Belt alternator starter angutsü.



## Serie A: Juventus-i goal 3-1 agi AC Milan kokogo

**Milan, Aenjeti/January 07, 2021 (Agencies):** Bodhbarnü Serie A asayamung nung Juventus-i table temaba nung alir AC Milan madak goal 3-1 takok ngua, tan season Milan pur asaya 27 nung tamakok ka danga mengudangi arur iba League asaya nung mezüing tamakok nguogo.

Juventus atema Federico Chiesa-i goal ana tashi idaktsü.

Stefano Pioli'er telok ya yimti nung tetokteper team Inter Milan pur tejakdang lir, koba Sampdoria-i goal 2-1 agi Inter pur akokba ajanga parnoki AC Milan ajangettsü maongka angu.

Taoba kum March ita coronavirus wara azüoktsü asoshi lockdown malidang, AC Milan pur asaya ka nung danga tamakok mengudang, kong taoba season asaya 12 nungi ka nung danga tamakok mangu aser parnoki jenjang trokbuba

tongteta tembang aser tan season nunga asaya 15 tashi atonga takok nguogo.

Chiesa, shiba taoba kum October ita Fiorentina nungi Juventus-i aru, San Siro nung asayaba mapang pai telok atema minute 18buba aser minute 62buba nung goal ana idaktsü. Kasa asaya nung Weston McKennie-ia minute 76buba nung Juve atema goal tasembuba inoktsü.

"Iba tamakok ya tejashitsüka. Iba season nung team balala den toktepa arur, onok mejungi tamakok angubaji Juventus team den alitsü, shirnoki kum tuku tashi atonga Scudetto takok angu. Ajisüaka, tamakok ngur sülen iba tejashi ajanga asaya tali tajungba melenshitsü asoshi onoki lenmang angutsü," ta Pioli-i ashi.

Asayamung ayonger team AC Milan-i 2011 kum nungi

'Scudetto' takok angutsü asoshi asaya arudar aser iba asaya tenzüksü lia ghonda ishika tejakdang tia makia team nung forward Ante Rebic aser midfielder Rade Krunic naprongla dak Covid-19 tejangja putet.

AC Milan nung goal timtiba idaktsüsang Zlatan Ibrahimovic densema Rebic aser Rade na masayatetba ajanga team nung ongdang tuluka adokdatsü. Taoba kum tatemlen Zlatan tetsüing yirur sülen, iba league asaya 8 tashi nung pai shilem magidang.

Kasa mapang, Juventus nunga Alex Sandro aser Juan Cuadrado naprongla dak coronavirus tashidak putetba ajanga iba asaya nung shilem magitet. Tang table nung Juventus pur jenjang pezübubai tuogo, koba point tenet agi AC Milan tesülen lir.

## '2023 Asian Cup' June 16 nungi tenzüksü

**Aenjeti/January 07, 2021(Agencies):** Asian Cup 18buba, koba region indang flagship national team tetoktepa ka lir, iba asayamung China nung June 16 nungi tenzuka July 16, 2023 anogo tashi ayongzüksü, ta Brehostibarnü Asian Football Confederation (AFC) sangdong ka ajanga metetdaksü.

Team 24 agi shilem agitsü aliba asayamung ya China kübok yimti 10 nung lemsar ayongzüksü aser anogo 31 tashi asayatsü, koba 2019 kum United Arab Emirates (UAE) nung anogo 28 tashi ayonga asayaba dang nungi anogo asem agi timba alitsü.

2004 kum kasa asayamung ayonger sülen, China nung iba asayamung tanaben ayongzüksü ternemba lir.

"China nung taruba asayamung ya Asian football putiotsü nung tulutiba aser tajungtiba asütsü onok dak teimla lir," ta AFC General Secretary Windsor John-i ashi.

"Alimai kodanga mamatettsüsa Local Organising Committee (LOC) aser Chinese Football Association longjemer 2023 kum iba asayamung tepor junga aser takok ngua ayongzüksütsü onoki imlaa atar," ta pai shisem.

Kum pezü nung khen ayonga asayaba asayamung ya 2019 kum tesüsa asayaago aser iba mapang team 16 nungi team 24 tashi timba kümtsü, koba asayamung putiotsü nung mezüing alitsü. UAE nung Qatar-i iba asayamung mezüing takok anguba sülen parnoki asayamung takok marok bena lir.

## Carabao Cup: Manchester City final-i iogo

**Manchester, Aenjeti/January 07, 2021 (Agencies):** Taoba mapang Manchester City nungi asayasang Colin Bell arishi kum 75 nung asüba sülen anogo ka lir, Bodhbarnü Pep Guardiola'er telok-i goal 2-0 agi Manchester United tsükdakja parnok pezüben buba atonga League Cup final-i iogo. EFL Cup semi-final asayamung nung City atema John Stones aser Fernandinho nati goal ka ka idaktsü. April 25, 2021 nü Wembley nung Manchester City aser Jose Mourinho'er telok Tottenham na final asayatsü.

Colin Bell, shibai kum 13 tashi football asayaago, pai City atema asaya 492 nung goal 152 idaktsü. Iba mapang pa dena team-i tongtibang asayamung 5 tashi takok angu.

Bell nem akhüm agütsütsü asoshi, semi final asaya warm up agiba mapang City asayar ajaki pa indang jersey no 8 ajener aliba jersey semer asayaago.

Iba asaya metenzükdang, asayartemi minute ka süngjema

mokremer nem akhüm agütsü aser iba mapang stands nungi Bell den taoba mapang külemi asayasang Mike Summerbee temulung raksaa ajepba nguogo.

"Iba takok ya Bell aser par kibong atema lir. Iba Club ajungkettsütsü atema par mapang pai shilem tajung agiogo," ta Guardiola-i ashi.

"United pur tsükdakja aser final tongtetba ya onok atema takok tuluka lir, aser tanü iba takok ya alakteta pa (Bell) atema lir," ta Guardiola-i ashi.

1981 aser 1984 kum tsüngda Liverpool-i League Cup pezüben tashi atonga takok anguba record meneptsü asoshi, tang City-i maongka tajung nguogo.

"Carabao (League) Cup ya Champions League masü ta ni jangjaa lir, saka pezüben tashi atonga takok ngura koda jangratemtsüka asütsü. Tanü team asaya yimya aser jakla ngua ni kanga pelar," ta Guardiola-i shisem.

2017 kum Manchester United-i EFL asayamung takok anguba mapang, Mourinho ya

United indang manager liasü aser Red Devils puri taoba season ana nung semi-final pezübuba tamakok angu asünung, Ole Gunnar Solskjaer kübok parnoki tanabuba jenjang angutsü asoshi atadar.

"Iba ya tia agi masu, khen khenbo semifinal nung team tajung den asayatsüsa akümer. Tanü onoki England indang team tajungtiba den asayaago aser team puri junga masaya ama nibo bilemer," ta Solskjaer-i ashi.

Taoba season tetoktepa nung, Solskjaer'er team ya Manchester City-i tsükdaktsü.

"Ajisüaka, onoki yimya aser tasatem melenshia asayadar. Taoba kum semifinal asaya den medemdangra, taküm onoki tajungtiba asayaago, parnoki tajungtiba nung shilem agiogo, saka aika nung ano melenshitsüla," ta pai ashi.

Tesüiba hoptatem nung Premier League title atema team anaprongla pei pei tata asaya nung toktepa shilem agiogo, saka team manager kati danga tongtibang asayartem animesüngzükdaksü.

## Alan Burgess alima nungi pilaogo



**Christchurch, Aenjeti/January 07, 2021 (Agencies):** First-class Cricket asayar rongnung tambusang Alan Burgess alima nungi pilaogo. Pa arishi kum 100 liasü, ta Bodhbarnü New Zealand Cricket (NZC) sangdong ajanga metetdaksü.

Right-hand batsman aser slow left-arm bowler, Alan-i 1945 kum England nung New Zealand Services aser 1940/41 nungi 1951/52 tashi Canterbury atema first-class 11 nung asayaago. 1940 kum Christmas anogomung nung Lancaster Park nung Otago den asayaba mapang pai run 52 nung wicket 6 out sütsü.

"Alima nung first-class cricket asayar tambusang, Alan Burgess asüba osang angazüka NZC-i mangyim jashi lemsateper. Rangiora kübok Charles Upham Retirement Village nung Alan'er jala Pip-i la tebu mejangba aji tasü aküm ta osang agütsü. Pa arishi kum 100 liasü," ta twitter ajanga Blackcaps-i lemsatep.

"Otago nungi Iain Gallaway, shiba arishi kum 98 lir, tang pa New Zealand indang first-class cricket asayar tambusang alitsü. Iain Gallaway dangbo India nung Raghunath Chandorkar ya alima nung

cricket asayar tambusang lir," ta kasa sangdong nung shia lir.

Pip-i ashiba agi, pa (Alan) tasünü tashi temang nung timtem kecha meliasü aser Mongolbarnü New Zealand aser Pakistan tsüngda asayaba Test tanabuba TV nung reprangogo aser Kane Williamson-i double century yangluba nguogo.

Kasa Test asaya tanabuba nung, New Zealand team-i innings aser run 176 agi Pakistan tsükdaktsüba sülen, Test ranking nung New Zealand puri Australia team ajateta temaba jenjang tongtet.

Iba Test series anaprongla nung Williamson-i aniba Blackcaps teloki Pakistan kokogo. Iba den külemi, ICC World Test Championship standings nung parnok jenjang akangshitsü asoshi tongtibang point aika ngutetogo.

Tang ICC Test ranking nung New Zealand-i point 118 nguogo aser temaba jenjang tongteta lir. Parnoki iba alizüing ajangzüketetba ya ICC Test ranking putiotsü nung tang mezüing alitsü. Kasa ranking nung Australia-i point 116 ngua jenjang tanabuba nung lir. Telok ana sülen, India (114), England (106) aser South Africa (96) alitsü.

## Thailand nung India shuttler tem training tenzükogo

**Aenjeti/January 07, 2021 (Agencies):** India nunger badminton asayartem, shirnok Thailand nung asayamung asem tashi nung atonga shilem agitsü terenemba lir, parnok dak Covid-19 tashidak meputetba sülen, Bodhbarnü training agi tenzükogo.

Badminton World Federation (BWF) sangdong ka ajanga angazükba agi, "Green Zone" nung shilem agitsüpur nisung 824 dak coronavirus tendangogo aser nisung ka danga iba tashidak meputet. Iba Green Zone nung asayartem aser parnok teyarir den stakeholder ajak densema lir. Item rongnung umpire, line judge, BWF nungi

teyariteperem, Badminton Association of Thailand, medical staff aser TV production crew dena lir.

Twitter ajanga Badminton Association of India (BAI)-i, India nunger asayartem gym nung temang anepalutsü asoshi nikongdang 2:00 ako nungi 3:00 ako (local time) tashi melar (12.30 pm nungi 1.30 pm IST) aser training atema aonung 7:00 ako nungi 8:00 ako (5.30 pm nungi 6.30 pm IST) tashi melaogo.

BAI-i ashiba agi, Thailand Open asayaba mapang densema shilem agitsüpur ajak asoshi latettsüba anogo 14 tashi quarantine meratem nung akanga anidaktsü.

Asian Leg, koba BWF

World Tour Finals den külemi tembangtsü, iba leg asaya matem tashi temzüing nung anidakba den külemi mapang shia COVID-19 test achaayanga agitsü.

Taoba mapang world no.1 Saina Nehwal-i asayamung nung shilem agitsüpur nisung ka dak danga tashidak meputetba sülen-a asayamung piyong physio aser trainer tem asayar den majurutepdaktsütsü asoshi BWF dang asüngdanga liasü. Ajisüaka, training metenzükdang, asayartemi parnok den külemi teyariteper (support staff) den mezüing anogo asem tashibo majuruteptsü atema BWF aser BAT nati temzüing latettsüogo.

## BILEMDANGANG

**"Kechi jembidir abensaa bilemer jembiang."**